

四庫全書

集部

欽定四庫全書

集部

翠渠摘稿卷三

詳校官中書_臣賈鉞

中書_臣劉源溥覆勘

總校官進士_臣楊懋珩

校對官中書_臣吳甸華

謄錄_人張曾秀

欽定四庫全書

翠渠摘稿卷三

明周瑛撰

記

溫明堂記

予知廣德州既三月婦吳氏夜夢過于祠堂之下見先祖困翁在座婦瞻拜成禮翁問曰瑛何在曰在堂翁曰此三大字可付瑛此甚善婦展視之乃玉鏡字也夙興

婦述以告予予曰此宗廟神靈有以告我矣夫王欲吾
溫也鏡欲吾明也使吾溫以接人明以處事茲固所謂
甚善者乎婦曰子於溫明何如曰吾接人未嘗為悻悻
容然嫉惡太甚見不善則怒怒則疾言遽色而不自知
此有害於溫處事未嘗挾私心然每別白是非或參以
已見時於民情物理容有未合此有害於明婦曰溫不
足而人惡之明不足而人怨之惡且怨禍所集也子其
慎之予曰氣平則親溫心虛則理明自今以往吾當養

吾氣而使之平庶不害於溫廓吾心而使之虛庶不害於明不然是予勇於悖祖訓而貪禍于州之人也因以溫明扁吾堂且記其事以自警

考功司題署記

成化甲午冬瑛奉州政入吏部以聽黜陟時考功長佐吏若楊君宗器陳君朝用閻君光甫邵君日昭皆舊識也初相見言不及私及考課畢乃進予言曰衆於考功署共扁曰居敬窮理予為嚮裏之學幸有以告我予謝

以不敏諸君固請予曰吏部為六曹之統而考功乃吏部之要司也易稱否泰由於君子小人之進退蓋內君子外小人為泰外君子內小人為否考功定黜陟乃君子小人進退之門也惟居敬則心常惺惺始可以窮理惟窮理則君子小人決擇精審而不至於混淆昔有宋諸君不足以成三代之治而追議之者皆致憾於秉軸諸君子也然則考功署扁曰居敬窮理知所本哉諸君皆曰周君言是也請書于是以聽羣吏以裨庶政以佐

于邦治而觀厥成功扁作於諸君入署之始記作於擬
獻績入部之始

王修撰墓記

去廣德城西五里許王修撰墓在焉修撰故台州人姓王
氏名叔英字原采仕建文朝為文字官素有氣節未幾文
皇帝南巡原采募丁壯廣德復自經死死時嘗自為贊曰
生既已矣未有補於當時死固徒然庶無慚於來世又
賦詩曰人生穹壤間忠孝貴克全嗟予事君父自省多

過愆有志未及竟奇疾忽見纏肥甘空在案對之不能
嚙意者造化神有命歸九泉嘗念夷與齊餓死首陽巔
周粟豈不佳所見良獨偏高蹤邈難繼偶爾無足傳千
秋史臣筆慎勿稱希賢尋有詔治姦黨其二女赴井死
其妻繫獄死人為上其所賦詩上曰彼食其祿自盡其
心耳乃置不問初原采將死以書抵祠山道士盛希年
曰可葬我祠山之麓希年卒收葬之蓋原采同希年台
州人故託以後事正統中少師楊公士奇始題其墓曰

嗚呼故翰林修撰王公原采之墓又為文以祭之曰嗚呼先生之學聖賢是師先生之行綱常是持先生之心金石其貞先生之志霜雪其明浩浩歸全乘雲翩翩我懷先生崇山長川桐川之藏既固且深遙致觴奠神其來歆蓋原來嘗薦士奇建文朝事定故及此原采死無後墳墓鞠為丘莽所可識別者僅有楊公之碑而已瑛為進士時嘗聞其事於其鄉縉紳及官茲土乃以特羊祭於墓訪諸故老得其遺事為詳云原采入廣德未久

車駕渡江羣臣出走原采募丁壯番上遇兵部尚書齊泰來奔遂潰歸原采死時年未四十蓋其見義之明殺身之勇處事之不亂殆由素養非若一時忙迫失據計出無聊自經於溝瀆者之比也因念其行義之篤固有聖朝所不諱者乃為脩治其墓并述其事以告後之人或議曰天命已定人心已歸子表章先朝舊臣非罪耶瑛曰凡忠臣義士皆各為其主耳原采仕建文朝故忠於建文若仕太宗朝則忠於太宗也必矣况兩朝天下

皆太祖高皇帝所經營之天下兩朝臣子皆高皇帝所
培養之人物也辟如天地分為四時凡禽鳥應候而鳴
者雖有春秋之異要皆造化中物未可舍此而取彼也
議者謝曰子言是也麗牲有石其鑱諸

醫隱記

凡仕與隱要皆有所挾無所挾則易動易動均之為喪
已矣成化辛卯予知廣德州念鑿學無傳乃開藥局以
延醫師以訓子弟將以濟夫州之大札者餘姚呂克正

挾其所有以來予問之克正曰鑿之道大矣難以口舌
爭請以州喻夫子之為州也創制立法以明治體所以
正綱紀也選材任能分理庶務所以備佐使也以醫言
之脉譬則紀綱也藥譬則用人也故吾為鑿不先視病
而先視脉盖脉有陰陽其行有紀度手三陰自臍走之
手手三陽自手走之顛足三陰自顛走之足足三陽自
足走之腹陽脉有六而其綱曰督督起于下極之俞循
脊裏上至風府入屬於腦會於顛終於額中陰脉有六

而其綱曰壬壬起於中極之下循腹裏上至關元衝於
咽喉是八脉者鑒經有成說矣吾畫焉而考之夜焉而
思之或按其井而知其所出或指其榮而知其所流或
審其俞而知其所注或察其經而知其所行或究其合
而知其所入故五臟病吾審諸陽脉五腑病吾審諸陰
脉臟腑皆病吾於陰陽脉交審焉或攻其表或攻其裏
或治其上或治其下抗者抑之沉者舉之數者緩之遲
者疾之不實實不虛虛不損不足不補有餘故吾之視

病也固非泛然無所指也其治病也亦非妄投以劑而姑以試人也竊怪世之為醫者往往不先視脉而先視病脉病矣而身無恙彼詫於衆曰是可以無醫一朝病作而身斃悲夫子曰子之說其醫國之道乎夫治國者必先正紀綱以立基本然後擇賢材以備佐使故社稷奠安天下無事所謂脉病而身無恙者其宋元之季世乎所謂一朝病作而身斃其航海而南委城而北者乎甚矣子之說醫國之道也子盍不仕吾且薦子矣克正

曰梗楠爵森斧斤聚矣犧牲文繡湯鑊具矣吾利吾鄉
吾何有於仕乎乃東棹帆以去予曰是隱者也彼盖有
所挾矣

雪樓記

錫山陳君朝用家燬于火廼起瓦礫而棟宇之復閣于
重簷臨于闌閑既成天大雪中外晃白君隱几啞然曰
是所謂雪樓者耶遂以雪樓名其堂且以自號他日君
官吏部予有廣德之命既領符南君諉予記之予曰是

樓非一木所就也蓋大者為棟小者為桷脩者為梁短者為構正枅斜拱橫楣直楔衆美咸具而棲成焉若夫雪者則斯樓一時之奇觀耳方其雪時天地無聲禽鳥絕跡拂幌霑帷洒垣侵壁窪者以平縑者以白縱目而觀萬里一色然則樓得雪而益奇哉夫樓高也雪白也高則易撓白則易涅高而不撓其衆美具乎白而不涅其剛氣足乎君所以名樓及所以自號而人所以望君者其不以是耶或曰元程鉅夫嘗以雪樓自號君蓋有

慕於鉅夫而云也予曰鉅夫受知世祖嘗以文學名世
矣然而清高潔白之操予未之許也方元兵南下鉅夫
投建昌其季父飛卿者攝建昌守謀舉城以降鉅夫不
能出一言以救正之方且為質於元取美官焉是可謂
高而不撓白而不涅者乎君號雪樓未必有企於鉅夫
而云也雖然予將論之他日泛吳江抵錫山登于雪樓
之上君必有以告我當相與陳君臣之道而極論之

放鹿記

成化甲午夏予臨州堂以聽政暑甚舍堂而門門聽察
近有譟于野者問之曰逐鹿耳頃而州人執鹿母來獻
繼又執鹿子來獻蓋野人逐鹿鹿窮奔入城州人因并
執之也鹿被繫在地倔起復仆跌蹶不止州人曰是可
飲之酒乃取酒飲之鹿得酒醉皆伏不動有讀本草者
曰是可以補羸益弱於兩角間取血飲之尤效因勸予
殺鹿予曰若誠愛我矣然予有所不忍也此鹿所謂窮
獸也獸窮投人將以逃生也知其逃生而又殺之仁者

不為也州治後有廣園命畜之園鹿母子得以遨嬉它
日其母為犬所斃其子日嘤嘤而鳴若有思焉者予悲
之秋七月予有事建平縣道過白茅山見是山南入于
廣野北枕于洄溪泉甘而草肥形高而勢阻以為鹿處
是山得其所哉乃繫鹿頸以鐵牌刻其上曰捕者有罰
告者有賞引于白茅山而放之嗟夫予放是鹿哀其窮
也且憫其母思有以活其子不知夫操弓挾矢者亦同
予心乎否也然惻隱之心人皆有之又安知夫人之不

同予心也使人皆同予心鹿其免哉因為之記

知恩堂記

邵君日照領鄉書入試春官擢進士第又以才美聞于
天官卿氏拜吏部考功司主事考功吏部要司也凡官
于是者實操黜陟幽明之典以臨百僚日照乃曰是父
鞠我師教我君擢用我此恩不可忘也因以知恩名其
堂而諉予記之於戲君父師之恩大矣是固不可以不
知也知之又不可不思所以為報也吾嘗稽諸古矣昔

晉武公伐翼殺哀侯止其大夫樂成以無死成謝曰民
生於三事之如一惟其所在則致死焉是致死者其報
君父師之道乎日昭讀古書思服古人之道且以知恩
名其堂則於事君事父事師固有不愛其死者矣若夫
敬恭職業愛奉顏色周旋函丈三擲杯而無愠者皆未
足為日昭言也日昭宜興人世居雙塘里堂作於某年
月日成於某年月日而知恩次第則日昭有別錄云

怪石記

予嘗得石高尺許怪竒特甚既閱歲墮地以毀予惜之
因記其狀石出寧國府山洞中水土滴積而成其崔嵬
而下覆者為巖巖下窈深而不可測者為洞洞前有穹
而入者為門其後蔽虧以通乎明者為竇其上聳者為
峯下夷者為坂中闕者為厓兩厓之間虛而有容者為
谷其尤怪者有巾服鬚眉全具如老人者有昂首岐角
如卧鹿者有隤背如龜而穴處者有引首如蛇而欲出
者有警而草如鳥欲下者一屬目之頃百怪咸集因為

盆池以處之石燥外虛中得水滲濕而上如吸引然乃
植花卉竹木不數日生意蔚然如栽培經歲月云者吁
石怪奇至此可謂極矣而卒毀者豈天惡之耶天誠惡
夫怪奇則持正守常者可無事矣因為之記

抄衍極記

衍極五篇元延祐中莆鄭子經氏所著至治中同邑劉
能靜氏所註釋其書雜考古今書法而求其所謂中者
恭定初龍溪知縣趙敬叔嘗梓行于其邑中矣今刻本

已不可見江西吳聘君與弼得抄本令門生饒燧輩錄之譌謬頗多上饒婁克貞學于聘君之門初請弗與固請乃得之成化辛卯婁君游南京與予論古人問學不輕授受談及張長史授顏魯公鍾書十二法因出以示予予觀未終版輒收去時行人司副周近仁方購異書予以告近仁近仁固請以歸期以達旦奉復周君因解釋原帙羣手抄錄中間轉益訛謬此本就周君得之其卷帙仍舊但後序并附錄移置卷末此其少異耳始予

年四十乃學書苦無師承所及見者姜氏夔書譜李氏

溥光書法趙氏

搗謙

學範陶氏

九成

書史會要及翰苑

菁華諸書然反覆推尋未得要領意者義獻微論或藏
山陰會稽諸故家而博學舊識或有能誦其法於千載
之下者往往訪而未得詎意正言奇論出自故鄉而他
郡博識顧先得之此予微不足於克貞之獨善而有感
於近仁之多能使予得以出於徑途之迷也

蓮溪書屋記

蔡君仲韶讀書蓮溪之上因名其屋曰蓮溪書屋蓋思所以世其業也蔡氏為豫章巨族世居豐城豐城諸蔡數百家門閭相向成市號南街仲韶祖以宋嘉祐二年徙蓮溪蓮溪四分南街族之一然而詩禮之澤至今未衰也仲韶蚤喪父能刻苦為學自立於其鄉以亢于其宗予知廣德時仲韶自豫章來州大姓王氏胡氏交致之以訓其家子弟仲韶撰長書來謁予方念是州學校廢弛人材放落文事不興凡能助予化理者皆禮遇之

以故仲韶嘗往返予門間嘗問經義予亦不之辭焉歲
癸卯仲韶謁予南都予方與繕部吳君守愚謀欲得師
以教諸子因館穀仲韶吳君所他日民部郎中韓君文
亮王君信之吳君文瓚員外郎達君仕弘主事王君德
安車君明理皆相繼遣子以來諸子有留者有去者仲
韶於來者不之拒去者不之追苟留在門者其業皆可
觀也今者歲云暮矣仲韶其將尋舊業予予聞讀書將
以窮理也將以修行也將以濟時也讀書而不窮理自

愚也窮理而不修行自誣也可以仕而不仕絕物也不可以仕而仕狗物也自愚非智也自誣非實也絕物非仁也狗物非義也凡此皆非所以讀書也仲韶往矣溪山如昨書屋無恙吾他日於豫章見有智而通行而立審時而為進止者其仲韶乎姑記其屋以俟之

西園記

成化庚子冬予以廣德知州遷南京禮部郎中明年春抵官買屋獅子橋西屋去官路遠而左右人家皆部處

如展兩翼然御溝水自前來注之繞吾屋轉而北去予
以其地邃深因治堂以靜虛名既數月予步自靜虛堂
入廢園以觀御溝之流語從者曰此可以為吾西園矣
乃具畚鍤鋤荒穢出瓦礫實坎窞因窪為池臨流為磯
經其地以為畦雜植菰葑葱芥諸蔬其不可畦者則植
竹木沿堤植柳柳下植槿植葵以及諸刺木宜為籬者
水首尾為柵柵下為小門以時啟閉已乃開徑入竹間
結茅為亭以臨夫池池中植蓮上為土臺以植花因命

其園曰西園亭曰此君亭臺曰留春臺磯曰滄浪磯灣曰清泠灣每春夏水長江潮且入上下相灌注成巨浸加以樹木扶疎蔭覆前後而春纖秋芳濯濯可掬白日坐其中如入深山巨林而不知身在闌闔中予既得園之勝因記用功次第與夫命名所以異者

小山記

予既治西園而刑部談君綱工部吳君昭錦衣衛鎮撫尹君臯及隆平侯張公祐皆遺予以怪石予嘗讀晦翁

集見翁汲清泉漬奇石置鑪熏其後以成江山雲物之趣竊謂翁於山水之癖最深也因除地此君亭北取所得石而跂累之虛其中以受水穴其下以通煙注水焚香則瀑飛煙布雖平居不出戶庭而林巒景物之勝皆映帶几席上矣因擇其有名者各賦小詩以攄幽思客有同予癖者皆從而和之予無事時取所得詩置諸左右瓦盆濁酒按節而歌之雖秦人擊筑趙人起舞亦自以為不以彼易此也季弟敬叔曰此無定主兄何樂之

深也予曰天壤間凡可樂者何限而亦何有定主吾於
介然之頃而有得焉則其中之甚適有非言語所可諭
者方其樂時吾將合四海以同歸又何私焉

重修儀真甄廠記

儀真有甄廠南京工部主之廠有治事堂歷歲既久旁
穿上漏其餘予舍亦漸就傾圯加以獻議者謂江南諸
窰冶並作可大得甄於是舊廠隘不能容甄甄漫積民
間穀菽地民納賦如故不得食成化壬寅開化施君勉

仁以南京工部主事來始視事見是堂風雨不支歎曰
是不可不為也及廉得軌所置地皆民產又曰是不忍
為也時孝感張公以都御史巡撫淮揚得專制境內君
言狀公報曰聽厥自為計君念民有訟于官罪得贖乃
以贖法處分是事於是民雖出竹木軌瓦灰石麻鐵粟
米夫役以聽乃建正堂一儀門一書房一因其舊而新
之則左右廂各一寢室一外門一又視民間有旁隙地
其在厥之東者二可置軌三百萬在厥之西者一可置

輒二百萬皆以贖法購得之於是治事有堂燕處有室
輒入于廠者不漫積民間地凡此皆關於廠政之大者
君又以其餘力去廠門北三百步建亭于河之濬以迎
使客以聯艫舳效陶公領荊州事扁曰運甓又東去治
事堂三十步結茅為亭下臨深池上臨廣園而大江諸
形勝可盡覽而得扁曰望亭此雖在所後然記謂張而
不弛文武不能此又君所以弛也予聞器大者有深容
力大者有重荷君以進士起家於筮仕之初即知重政

恤民如此使他日當大任臨大事其所施為又何如耶
予又聞君於財計所入收掌有人給領有籍日但稽其
入出盈縮以督其成功而已此尤見君慮事之審操已
之慎而凡建功立業者所當取法云始事以某年月日
告成以某月日其所購地及所置什物則皆備勒諸碑
陰云

續騷亭記

騷何為而作也古者詩言志歌永言而騷詩之變也其

趣遠其聲希徘徊曲折而求以達其志焉者也屈宋至
矣西漢而下其侈辭乎先族兄諱瑩字次玉號鶴洲主
人少有文名天順成化間握符臨汝以寬得民而章甫
逢掖士多從之游平生著述頗富而臨汝人所刻郡齋
新稿特其見於作郡者耳初為南京工部主事時與蘇
人劉君昌同官昌字欽謨號樓園先生博學高才與鶴
洲兄相友善每公暇輒相與寫騷為樂劉君曰朝寫騷
兮亭中暮寫騷兮亭中騷兮寫兮古人與同以日以月

兮以泄予衷兄和之曰朝寫騷兮亭中暮寫騷兮亭中
騷兮寫兮伊誰與同據賈之思兮揆原之衷兄少愛瑛
嘗屬瑛修文以紹述家學瑛謝以不敏成化甲辰予重
握符臨汝因讀騷辭而續和之曰朝寫騷兮亭中暮寫
騷兮亭中騷兮寫兮兄弟與同釀太和以為府兮抱明
月以為衷士人陳嘉謀見而謂曰騷久絕響今倡而和
和而續其為楚辭添後語予予曰不敢也搜園鶴洲皆
作者而予識趣凡近聲韻俚俗安敢有附于為騷蓋亦

言其志焉而已予聞太和養萬物而物無不養明月照萬物而物無不照枯根之腐萌蘖弗生焉覆缶之下月光不照焉盖太和能為養而不能養於所不養明月能為照而不能照於所不照能為養者公於為和也其有不養者物取之也太和無容心焉能為照者公于為明也其有不照者物取之也月無容心焉無容心即所謂虛也虛者天之道也予少為學見人急恩讎快私念心竊薄之及為郡以虛視之而已以虛為郡宜乎物我合

一恩怨兩忘其有不然者習為虛而未盡所以虛也敢不自省予嘉謀作而曰騷云予哉吾乃今而知夫子之志也請備書之予初到官嘗節縮稍入為讀書屋於私第西南偏既又為小屋以庋書及因地之窪而池之以滌筆硯創畫多時名號未備至是題書屋為臨汝書院池曰浴雲池改小屋為續騷亭而備書倡和之語於亭之南楮以待夫同志者昔子夏曰百工居肆以成其事君子學以致其道又曰仕而優則學學而優則仕後之

君子必不以予為無事而勤民云

洗心亭記

姚江之上有華氏世以讀書聞華氏佳子弟曰福福字廷禧少讀易廼取易大傳語名其亭曰洗心成化甲辰舉進士丙午出知臨川縣臨川撫屬邑也予時為撫長吏廷禧每以政事相咨稟道術相訪問有相成之義焉明年丁未予改郡鎮遠因請記其所謂洗心亭者嗟夫自九師說興而易道以晦學者遂不識心亦孰知所以

洗夫心哉夫易天道也其有迹可見者曰蓍曰卦曰爻
蓋圓而神者蓍之德也方以知者卦之德也易以貞者
六爻之義也此三者潔淨精微之至也聖人以此洗心
退藏於密蓋寂焉而莫窺其有感焉而莫測其用隱之
至也學者要必先有以探陰陽之蘊通神明之德窺見
天下之至隱以其潔淨精微之教洗吾穢濁雜亂之私
然後用神以合蓍用知以合卦用易以貞以合六爻之
變而於天道無不合矣是知聖人所謂洗心者不待洗

而洗也學者洗心要必有以洗之而天道乃得也華君
勉乎哉三古四聖之心其緒微矣王輔嗣韓康伯輩岐
天人而兩之而以茫昧荒忽談易遂使經生學子無所
依據以為所自入之地識者恨之程子曰體用一源顯
微無間朱子曰用應始有體該本無吁至矣微程朱氏
吾誰與歸亭在華氏居第之左偏高若干廣若干無雕
刻藻繪之飾作於某年月日成於某年月日記作於予
改郡之明年三月二十有八日

石崖書室記

成化甲辰予自南京禮部郎中出守撫州丁未改鎮遠鎮遠在古荒服之外是為蠻獠出沒之衝蓋夷郡也予來既治邸舍以居乃別作室于石崖之上以為讀書所讀書而別作室以圖靜也作室而依石崖據形勝也室前跂石而臺之題曰讀騷臺懷古也臺左鑿厓石以登曰雲根嶺書僻也石厓書室總據形勝而臺與嶺皆書室所有也居夷作事藉故規制皆就簡室為崇僅盈丈

脩視崇尺有二廣倍于崇加尺有三臺之崇之脩皆與室同廣不及室七尺嶺自平地至臺凡五折其崇與臺等其脩視崇倍之夷民寡詞訟平居夷獠受約束木契箭刻不馳皆暇日暇則坐室中讀吾行厨所有書或挾楚騷讀臺上時上下往來于嶺甚適也客問曰子年邁矣尚佔畢未已乎予曰天道備於聖人聖人心術寓於書而易詩書禮樂春秋皆書之大者讀書則有以探聖人心術精微之蘊而天道可得以是而立三綱以是而

秩五常以是而酬庶務天地所以位萬物所以育皆是物也惡可不讀書客曰騷之為辭風雅之變也昔人嘗謂醇儒莊士或羞稱之子何以為騷為哉予曰騷之辭怨懟激發可議騷之心可與日月爭光也當時懷王不知原矣襄王又不知原矣後世因讀其辭而得其心固有為原流涕者此予所以深悲之也客曰先生之言有以破予荒哉吾乃今始知室與臺不虛作也客退因取所以立名以鐫于石以樹于臺于嶺復備述其事以記

于室

壺中丘壑記

鎮陽有怪石禹貢所不載者弘治庚戌夏季弟敬叔來視予一日入後圃循讀騷臺而東見有礪砢伏莽中者發之皆怪石也告予曰兄癖類柳州性好山水藉此為山凡諸形勝可不驚遠陵危而得之矣予曰善乃稍稍為正中峯分左右麓伏者起之滿者虛之對峙者差互之直往者迂迴之於是立者為峰側者為厓深者為洞

空者為谷復取蘭菊竹木分植上下然後歐陽子所謂
鬱然而深秀者次第而成山成復斡地而窪之覆水其
中命曰勺湖予曰此非誣耶季弟曰世固有以小為大
者越人賈汝易嘗言其郡有秘圖湖僅大如碗此之為
湖孰曰不然復命家僮縛茅為亭取蔽風雨告予曰昔
王龜齡嘗記其第所謂笠亭者此得無近耶他日予登
焉見夫所謂山者微失寸碧掩映林麓宛然如對泰山
華岳又見夫所謂湖者輕瀾淺波拍滿涯岸恍然如臨

震澤洞庭因題曰壺中丘壑進李弟而告之曰夫天下
事有實體可據者是謂之真無實體可據者是謂之幻
世有以幻為真者亦有以真為幻者以真為幻此妙識
也妙識入於無故不有其有以幻為真此俗識也俗識
膠於有故不知夫所謂無者然此二者為說皆非也是
盖有所纏繞強自排遣耳君子則不然君子之於天下
也不離物以自高不嬰物以自病以天下之理應天下
之事其中廓如也李弟作曰因丘壑之談而得處世之

說請書以為記

貴藩重修後堂記

古者國君居室之制其前曰路寢其後曰燕寢路寢公也治事之所也燕寢私也退休之所也今制官府有前堂其古之路寢耶有後堂其古之燕寢耶作前堂以治事所以致勞也作後堂以退休所以就逸也一勞一逸古之制也我太祖高皇帝統一寰宇建十三布政司分理天下事其軍馬其財賦其刑辟各置大僚以掌之勢

相頡頏而不相下所以矯前代方鎮尾大不掉之弊而躋天下於乂寧之域也貴州本夷部高皇帝時以宣慰使田氏分領其地永樂十一年田氏違命治兵相攻無臣子禮文皇帝惡之削其官乃籍其家建布政司以備一藩之制初諸宣慰頗暴慢無禮至是皆俯首帖服惴惴不敢動百年來諸賢良相繼為治其政漸敷其俗漸移官府次舍以漸修理弘治六年吳興張公廉由貴州按察使擢本司左布政使一日徘徊廊署顧叅政劉君

肅叅議韓君鏞陳君與謂曰吾藩財賦人民視中州諸
藩不及三之一然而倚角形勢控制苗獠以通西南朝
貢道路其地至要也今前堂如制而後堂隘弊殊甚其
何以集謀議廣忠益而合籌策之公又何以布筵席舉
觴酌而伸燕好之私某不敏願相與圖之諸君皆曰魯
叔孫婼訟于晉所館雖一日猶修葺其牆屋及去如始
至焉今吾人實官于此而衙宇不治宜如公所言者時
方聚兵境內以討都勻諸夷公念使司財賦所出朝檄

暮輸不暇以為既而羣克授首境土廓清公喜曰乃今可以有為矣因以其事告于撫按諸公皆曰宜如制公乃約稍入而節縮之取彼與此計工授程陶土為瓦煨石為灰取棟梁榱桷于羣木所宜建後堂若干楹東西廂若干當庭之中而屋之以道前後往來又若干楹後堂之廣與前堂稱高視前堂為不及而修過之其制雅雅言言坐以談公列以序私無不可者初居民十數家漫入省垣與羣吏雜處公曰民與吏清奸慝曷去乃授

之直俾擇便地以居即其處為左右二叅政廳舍又分其餘以為吏舍至是以堂言之則前後之制備以居處言之則內外之分嚴公又命築長垣環繞于司如古所謂牙城為者其垣下甃石上覆以瓦高厚長大牢不可拔經始於弘治七年夏五月告成於是歲秋八月凡縻白金若干兩粟若干石邦人皆若不知公有所為焉者既落成眾謂古人興作皆有所表志况此工最鉅惡可以無述乃走使蜀藩屬瑛紀其事始瑛待罪鎮遠府於公

為屬真各有過吾郡者談方今人物謂公威而不暴明而不察簡而不煩有古人風度則其所抱負深矣抱負深者則發泄大然則今之事業其昔日之素蘊耶探公所有而推之厥施未艾也豈但制一藩而已哉請以是刻諸石用以紀前緒且以卜後勲

教諭黃先生祠堂記

君子居官而人愛之既去而人思之思之不置又從而尸祝之吁此可以觀德矣予叅知蜀藩政事因巡歷下

邑見廣元縣有教諭黃先生祠竊欣慕焉先生姓黃氏
名猷字聲叔同予興化府莆田縣人先生兄龍官戶部
主事兄子綸官順德府教授今孫顯登進士第為戶部
主事先生講學家庭兄弟叔姪自相師友宣德中以明
經薦授本府仙遊縣學訓導丁內外艱更無錫麗水青
田三縣學訓導天順中以教有成績陞廣元縣儒學教
諭廣元為蜀北鄙軍士荷戈而立編民鮮少學久廢師
生倚席不講先生來以義倡率廣元人士廣元人士翕

然趨之乃相與修學舍建文廟塑聖賢像每日衣冠坐堂上呼諸生使前授以經書背誦覆講如法其教舉子業務識體裁不剽竊陳腐如所謂活套為者諸生苦貧無資以為學先生曰汝第為學吾當思以給汝乃察其貧甚者解衣推食以授之諸生至為泣下其或恃財怙勢不循軌度則嚴呵之呵之不從施以朴教務從善乃止故廣元人樂從先生之教而畏先生之嚴明及其久也而心安之皆曰先生真愛我者矣先生既歸諸生指

其所修廟學曰此先生之遺緒也其可忘乎見所改課
程曰此先生之遺澤也又可忘乎乃即學宮之旁立祠
肖像以祀先生焉吁此豈可以力致哉蓋先生學問淵
懿勇於為義而加以至誠故能感人若是其深且久也
予所謂君子居官而人愛之思之尸祝之而可以觀德
者先生真是矣然先生行義不但施於廣元而已嘗聞
在仙遊時知縣王彛以白金二百兩寄先生所雖愛妾
莫之知也彛病死先生呼其子來授之人服先生之義

在麗水時浙寇張甚衆以先生有材畧推以捍賊先生
部署既定乃諭以忠義衆感激效死鼓之而進賊奔北
境土以平人服先生之勇其入蜀時與僉事董公應軫
同時濟江公船覆呼近岸諸小舟莫肯前先生曰是欲
得財耳乃自取囊中金分授之衆乃亂流而渡董公獲
免人服先生之仁且知處事之變凡此予聞諸先生之
孫顯而熟焉者先生之祠在故學宮之內近學遷而祠
毀叅議喬公廷儀分守川北道命重立之此見喬公秉

彝好德之心亦廣元人愛先生之未已也瑛既備書先生教廣元事復以其平生行義而類書之使廣元人并刻于室中他日讀者必有感慕興起願為先生之所為者矣是為記

揚子雲書院記

蜀讀書稱揚子雲氏子雲鄭夾漈通志謂蜀成都人班固漢書謂郫人按子雲自序謂其先出周伯僑氏食菜於晉河汾號楊侯晉六卿爭權逼之乃去晉逃楚家于

巫山既而遡江處巴繼又遡江處岷山之陽曰郫則子雲固郫人而成都縣中有洗墨池意其讀書僑寓之所也子雲仕漢當成哀平間官不過為郎其學師承未有所考或謂參摹四方渾天之事得諸嚴君平未知是否其所著書有太玄法言訓纂州箴解嘲及有反騷廣騷畔牢愁甘泉河東較獵長楊等賦子雲沒後法言盛行於漢其太玄至宋司馬公始為之註外此未有好之者皇明繼宋而興以儒術治天下其教學者以易書詩春

秋禮樂為宗以語孟庸學為要以濂洛關閩諸論說為
羽翼若太玄經等皆不列於學官故揚氏之學益微子
雲於西土豪傑之士也漢武帝好辭賦司馬相如輩挾
其所業以進大見寵幸子雲初雖有所慕羨終覺其非
是乃退而自守寂寞清靜留心太玄以成一家學可謂
高出等夷矣惜其擇義不精失身所事綱目以為貶君
子雖重加愛護而終不能掩其失也予每見韓昌黎氏
以孟軻楊雄荀卿並稱間又曰孟氏醇乎醇荀與楊大

醇而小疵則楊氏之學當在孟氏下與荀氏並駕至於
司馬相如輩則非所論也子雲沒千餘載邠人張伯明
氏為作書院於邠書院前為堂堂左右為夾室夾室之
南為廡廡南為門堂之北為樓樓制高亢弘敞每開軒
四望則岷嶓諸山左右環繞而汶江湔水交流其中而
子雲所著益州箴歷歷可考既又多購書度置樓上將
使其族與其鄉子弟講習讀誦邇子雲舊緒反諸醇而
益大之其用心良厚矣張氏在邠為族最蕃先自河南

徙郫至伯明委身蜀王府為承奉正王以其忠誠呼曰
宋景故又別稱宋景平日樂為義事雖費鉅萬無靳惜
意如宋潛溪謫死于蜀乃以其所營壽藏處潛溪秦李
冰鑿離峯引江水內注其經于郫雖資灌溉未免病涉
乃伐石為梁極其壯麗行者稱便至是復作子雲書院
其表章先賢之心勸率後學之意至矣予在蜀時嘗識
伯明及奔母喪東歸伯明遣人來索記因述予所見并
為之書

莆城闢郡學記

莆城中有梅峯焉梅峯東翥如鳳凰展翼形郡學在其
下考前志宋咸平二年始建郡學其地天子所予而學
則邑人方儀陳詡相與出私錢為之為之不足乃請官
錢以益之也自宋歷元以及我明累政君子屢加脩治
間亦嘗改作矣然而去宮墻不尋咫尺居民累數百家聯
甍接棟不見首尾君子恒病其阻闕阨塞欲撤去而不
可得者弘治乙丑進賢饒公塘為御史來按閩前是宜

興抗公濟為按察副使來提學又前是南陵陳公效來
為莆郡守御史主治提學主教郡守蕪承治教而致之
民是數公者陽虛陰吸化軸轉移人曰宋咸平己亥建
學至是五百有餘歲矣學運其當興乎我明正統乙丑
脩學至是六十甲子數周矣學事其伊始乎乃者丙寅
歲是為正德初元御史按莆既謁文廟退升明倫堂聽
講已乃徘徊顧瞻若欲有所脩治焉者及出門顧謂太
守曰莆以科甲文章名天下而學宮前僅容旋馬此非

所當治耶幸為我圖之太守退與通守汪侯鳳朝節推
沈侯欽謀盡買學前地二侯曰此善政也宜決成之又
曰是地軍民雜處屋在民者府平其直屋在軍者衛平
其直太守曰善乃謀衛帥丁侯賢丁侯忻然以從相與
處分定乃圖上方畧于御史于提學御史提學交報曰
可命下軍民以得價平爭拆屋他徙以其地歸之學舊
時訓導衙舍與民居錯至是并撤之共得地六畝一分
七釐其縱也東為脩二十丈有六尺西為脩一十四丈

有七尺其衡也南為廣三十丈北為廣二十七丈有九尺乃繚以周垣中為垣而亘之以分南北北為明堂如其衡之廣縱六廣之一兩端為綽楔以通往來用宋舊扁東曰達材西曰成德南為齋房二十有六間為廳十有二為穿堂四前有院落後有疏圃以處諸生之治行業者却立而望之壺山前峙天馬西列穀城五侯諸山自東暗拱之形勝之佳前此未有也始事於正德丙寅八月乙巳終事於其年十一月癸酉僅三閱月而功告

成焉是役也財不取於官帑力不起於丁夫地價木價
工價太守皆取裁於御史區畫用之可謂善於建功立
業者矣其他若汪侯之提督沈侯之贊襄知縣周侯廣
之維持文學掾夏君饒趙君增戴君楨相與周旋不怠
至於府檄義官曾崇賢監護屬功曲盡其道衛檄知事
楊文千戶段志賢平定屋價予奪得中皆可書也夫以
數百年之事功而成於一旦十數人之集事同出於一
心誰之力也御史之力也人謂事關於氣運果然哉太

守將紀功所自而徵記於瑛瑛既直書之矣竊謂學校
由氣運而興則人材當應氣運而出願我人士學宗孔
孟業式伊周以此酬御史作興我學校之意以此副提
學教養我人士之意幸甚是為記

重修蔡忠惠祠記

出莆城南三里許為蔡宅有忠惠祠焉忠惠名襄字君
謨宋端明殿學士考宋史及郡縣志皆謂公仙遊人豈
後徙居莆田故此有公宅歟歲久宅廢弛漸入人家而

祠亦傾倚不立明成化初都御史滕公昭行部過城南見路左廢祠有蔡忠惠字問曰豈作四賢一不肖詩者耶從者曰然公下車瞻拜吁嘻命郡守潘侯本愚重作祠屋三間奉祀唯謹弘治七年今郡守王侯弼以為祠隘不足以稱神棲乃拓而大之作正堂三間高若干廣若干修若干復作寢堂三間高廣修殺之旁翼以兩房又殺之近祠有荔枝龍眼園王守曰此故蔡宅地宜贖之以益歲供於是郡人御史林君誠之子近龍道判陳

君瓚之子鉞各持券以來曰蔡忠惠後學典型也公崇祠以祀之近龍請割地六分鉞請割地三分并所有樹木入于祠堂庶仰承公敬事先賢之意與直皆辭焉王守曰賢哉二生也可與共為義矣祠成王守率僚屬饗諸其室牲豐酒馨禮儀明備鄉人來觀皆相與嘆曰忠惠沒數百年今廟貌如是人固不可不知所以樹立也考公傳公舉進士調西京留守推官時范仲淹權知開封府以言事侵宰相去國余靖論救之尹洙請與同貶

司諫高若訥獨以仲淹為當黜歐陽脩以其不知耻移書責之由是三人者皆坐譴公作四賢一不肖詩都人爭相傳寫契丹使市歸張諸幽州別館慶曆中知諫院直氣凜凜凡所言皆切中時弊匡益甚多以母老求知福州開古塘溉民田奏減五代丁口稅之半入修起居注救唐介得貶近地進知制誥三御史論梁適解職公不草制遷龍圖閣學士知開封府開封京郡吏緣為姦公摘伏如神吏不能欺以樞密直學士再知福州禮聘

郡士周希孟陳烈陳襄鄭穆等以經學誨諸生禁郡人
不得破產飯僧以供喪繼知泉州架海為梁長三百六
十丈又植松七百里以蔭行道之人召為翰林學士權
三司使較天下盈虛出入以制國用其姦弊剗剔殆盡
綱紀纖悉可法英宗不豫皇太子立人謂公有間言公
不安求外拜端明殿學士出知杭州丁母憂去尋卒贈
吏部侍郎淳熙中賜謚忠惠其為文章也詩辭清粹淵
永制誥醇正典重至於序記諸作往往雅馴多變化不

襲舊作讀之有意味蓋公在當時以善書名天下故文有所掩也於戲士生於世氣節足以動縉紳勲業足以被黎庶文章足以軌範後人則尸祝於其鄉也宜矣丙辰歲予抱憂家居公十四世孫宗計曰郡守加惠我先人至矣而二公子高義亦不可忘也若有所紀識恐後世湮沒無稽乃具其事本末以來且錄公文為贊予曰是固所當記矣因諦書之且書公事使郡人有所考覽以為勸云

翠渠摘稿卷三

欽定四庫全書

翠渠摘稿卷四

明 周瑛 撰

銘

楷木笏銘

予為進士時人遺予以楷木笏且告曰此孔林遺植也
其理赤其節密可以直拄不可以橫擊也及為知州官
五品笏用牙予以楷木之訓不可違也乃函以入州製

之銘曰

孔林遺植千八百歲直擊則堅橫擊則碎凡我君子靖共爾位視斯式斯庶幾無愧

屏風銘

廣德州公署後有屏風焉黜外素中予題其前曰視民如傷復製之銘以自警銘曰

損上益下是謂之益損下益上是謂之賊彼損下者見利而甘擣骨椎脂一何其饒惟彼損上貞固

自守謂他人肉敢入予口損下既多人莫予何神
明惡之時或見呵君子損上固無所為心公理得
庶幾無愧二者之間其幾至微取舍向背天不可
欺吳言于前法言于後汝苟違之又將誰咎

撫州府正義堂銘

太守私第在羊角山下此為前門歲久將壓予來易為
廳事扁曰正義堂而製之銘曰

以理處物是謂之義以心徇物是謂之利卓哉董

相為漢儒宗發正義言以破昏蒙我聞求仁惟公
為近惟公之至斯理之盡顧予不敏叨守大邦力
綿負重如鼎斯扛事有萬殊精粗巨細載謀載度
從心之制獄有五訊絞斬杖笞維明維慎惟罪之
宜義所當為予何敢止禍耶福耶誰其卹彼義所
當止予何敢為愛耶憎耶予其誰知益言熊掌視
魚為美我當舍魚熊掌是以又言盜跖與舜異趨
我不為跖而舜與居是非殊途生死異路毋或徂

徂竟爾迷誤明有禮樂幽有鬼神出入視茲求仁
得仁

洮硯銘

王節判贈予以洮石予謂硯譜洮石色綠此色黃如何
王曰固洮石也因治為硯而製之銘曰

維洮含英維奎降精色幻黃綠五行攸屬不駁而
淳不燥而溫敦之琢之久相斯文

瓦瓶銘

予陶瓦為瓶其制樸雅製之曰

匪銅匪錫孰為斯器不雕不鏤孰為斯制枯枝素
葩淡藏春意置我茆茨與我心契

木瓜杖銘

園有木瓜樞姪取以製杖按本草云木瓜為杖利筋脛
銘曰

偏而予正曲而予直予受予鞭策危而爾持顛而
爾扶予賴子枝梧

贊

宋戶部侍郎李公紳遺像贊

宋溧陽李公紳仕高宗朝為戶部侍郎遺像至今猶存其裔孫某持入南京禮部謁侍郎李公本公命瑛為之贊曰肌膚玉琢色何溫也眉宇春盎氣何醇也廟廊佐政官亦尊也雲雷構難時方屯也損上益下偉事業之經綸也於戲世代遠矣人物更矣載瞻遺像耿聲光之猶存也

鈍齋先生遺像贊

瑛少受學于鈍齋朱先生深荷教愛先生既捐館舍其
子南京戶部主事愷屬瑛為真像贊俯仰疇昔泣下沾
襟贊曰

金玉其相敦琢其章業專學精言直行方太山嶷
嶷北斗有翼入此里閭孰敢不式

井菴先生遺像贊

井菴監察御史林君誠號也君為御史時予嘗為君以

數起卦遇井其用爻九三予曰井以利濟為功九三未
及為用而體已具過王明而汲則施者受者井受其福
也君曰吾喻之矣乃以井菴自號今君已即世而像存
焉謹為之贊曰

維材爾磐維璞爾斲而後騫伏而乃作其登進
士也克紹父烈其為御史也不負君侂激雷霆之
怒不震不懼遭市朝之撻何愧何忤學政脩明鹽
筴簡約章疏稠疊言論謇諤若夫繳還勅書歸卧

林壑白壁無瑕清風如昨此則公剛斷自許非
若常情旅進而旅卻也

韋提學先生畫像贊

先生名斌字尚質淮人也將致事去以畫像屬予為贊
予謹稽輿論而贊之曰

吾持吾剛孰得而摧吾行吾公孰得而回參苓溲
勃既勞於收拾松栢桃李亦慎於栽培蓋所恃者
天知所不避者人猜此公行已之大槩也若夫相

貌尊嚴衣冠岌嵬雖丹青能肖像其彷彿亦何足以盡其中之所存也哉

畫像自贊

予守廣德日嘗以事詣姑孰姑孰有繪予像者面部不甚類但衣冠樸野風神拓落全類予醉中因自為贊曰
勢不可摧利不可媒一見是處如山斯頽知我者
謂我自信不知我者謂我執迷不回

傳

瞿谷子傳

正統末車駕北巡皇太后命太子攝國邸王為輔而邸王信佞者言遂即真繼又信佞者言廢太子而立己子吏科都給事中林聰監察御史鍾同禮部郎中章綸南京大理寺少卿廖莊皆冒死以諫天下翫之予亦竊加歎賞然頗惜其後時焉蓋羣公之諫宜在邸王謀即真之時即真事寢則易儲之事自寢矣時家有鸛鵒圖因隱約其事為瞿谷子傳以告後之為諫者貴知幾也傳曰

瞿谷子不知何許人或曰其先嘗仕於少昊氏之世

左傳

凡為族三百六十九苞氏其長也

格物論

世居濟以北

考功

記黑衣高憤性慧而善語所居之室不過峭壁層崖額

然一穴而已魯昭公三年嘗踰濟水公不能用

春秋傳及五行

志晉桓豁領荊州有參軍愛其辯羅而致之幕下終亦無

所委聽

幽冥錄

唐貞元初四方厭亂與青烏先生變而服鰻

或見而異之以為吉祥強邀之以獻于天子入關東西行

者避路

昌黎集

自計曰吾其過乎比至京師天子不尚口辨

為同類者譏侮乃曰吾其行矣吾不行人將腊吾庖人之
肆矣遂逸去而以告于九苞氏九苞氏曰子來矣吾得以
語子蓋智者能用世不智者為世用能用世者而世制于
我不能用世者而我制于世世制于我者得其幾之謂也
我制于世者失其幾之謂也我用世而得其幾則世之從
我也如轉丸然故世為我用我失其幾而強與世合譬如
謀以方軌而走坦塗一起而一仆矣何謂幾蓋善惡已形
而未著焉者非至明不足以知此幾非至勇不足以用此

幾自古謀人家國未有不知幾而有濟焉者子必勉之瞿
谷子起謝曰丈人有以教我矣丈人有以教我矣

辯

柳子宥蝮蛇辯

柳子家僮得蝮蛇將殺之柳子宥其死而遣之其說以為
蝮蛇為毒甚非得已緣形役性不可自止且未即人而人
即彼執而殺之則益暴矣蒙中子曰柳子之見其駭哉夫
以蝮蛇為毒非得已則天地生蝮蛇豈得已乎天地生蝮

蛇非得已則人所以治蝮蛇者惡可已乎蓋天地生物氣化不齊伸縮盈虛錯綜雜揉故其偏駁乖戾之甚必生而為毒螫饒噬之物蓋非天地欲生此物也氣之所至不得不生之也有聖人者出明大中至正之道凡非天地之得已者皆從而治之若禹鑄鼎而治神奸益烈山澤而治禽獸周公相武王誅紂伐奄而治虎豹犀象之屬是數聖人者豈過用其心哉誠以物害不去民生不安也今夫蝮蛇為毒噬草則草枯噬木則木瘁噬人不死則亦肢體拘攣

而不能伸縮其毒甚矣乃歸於氣化之偏而可以無殺推是心也設有人焉如古越椒氏生而豺狼之聲長而傷人害物乃委曰氣化之偏使然而可以無殺刑政不亦頗乎且天地生萬物人為貴故王者養萬民亦以人為主若夫水土之產昆蟲草木鱗介之屬皆惟人之用不可與人論輕重也故先王制刑凡人殺人者其罪死若折一木戮一獸踐踏一螻蟻先王豈罪之乎今以蝮蛇為未傷人而罪不至死則將俟殺一人而後戮一蝮蛇是視人之命與蝮

蛇等也輕重失倫甚矣嗚呼柳子之說行則民奸物怪之害興生人族類之滅久矣予偶讀其文病其見之駭且懼其禍也故不辭夫僭而為之辯

題跋

題姜氏雙槐堂

王氏植槐以卜公輔而公輔應姜氏植槐以卜科第而科第應何天人相去之遠而可以責報如是之速耶蓋天人為理一而已矣人能順理則合乎天矣人能順天

則天與之矣故以人責天而天無不應者其幾在此也王
氏事載宋史後世能道之矣姜氏今為廣德州人其先曰
克銘者自四明來分教廣德州庠遂占籍于州至是四世
矣克銘之孫有諱韶者嘗植雙槐于庭祝曰子孫有以科
第顯槐其盛乎既而東一株盛其從子洪果登進士第拜
監察御史未幾西一株復盛其子溥亦登進士第今為嘉
魚縣知縣蓋姜氏在廣德治產修業後于鄉之人而讀書
修行恒先于鄉之人天不言而善應其於姜氏則既與之

矣子孫之興不亦宜乎嗟夫天未嘗有心於爲人也積善降福是福以善取也積惡降禍是禍以惡取也世人不爲善而爲惡及至顛踣而反以怨天可謂不知務矣

題王皆山白雲樵唱後

國初閩中有十才子皆以詩鳴或云皆山即其派也十才子詩去今未百年皆散落無存而皆山有鳳臺清嘯草澤狂歌白雲樵唱凡數種樵唱近存吏部郎中黃君汝明所間多譌舛大司徒黃公見而嘆曰賢哲凋謝聲

光猶存吾生長里中不為表章何以酬故老因以元稿托
汝明編次成集付戶部郎中陳君孟明校正之公將梓行
以吾莆林殿元長樂東選部嘗序先生全集矣乃自為序
而命瑛題其後瑛謂閩中舊為道學淵藪詩辭其緒餘也
然詩辭亦道學旁出其抽思造意探玄索微出入造化聯
絡萬彙其高妙處與性命相流通詩所寄非淺淺也聞十
才子詩皆祖林膳部子羽而王皆山高漫士其最高者夫
寶玉在山草木生輝珠璣在海波光橫發先正詞章流落

鄉邦則殘膏賸馥沾溉後人公學博而才膽官高而力鉅
他日博訪諸作而類集之芟繁摘要取純去駁俾成一家
書以訓吾黨小子則閩中詩學又不可謂無師承也

東萊居士題引

周家開國自耒耜中來考其所以為教曰勤曰儉曰孝
敬而已故幽詩有曰二之日于耜三之日舉趾言其勤
也雅曰攘其左右當其旨否昭其儉也頌曰烝畀祖妣
以洽百禮彰其孝與敬也居士東萊其有得於此乎有

得於此則業廣而用足人和而神孚家道成矣他日形
於述作播於詩章後世讀之必以居士為楷範不但風
雅頌有所稱說而已也或曰居士隱者蓋有國者秉鈞
居士秉耒將以其所業而忘夫富貴者也果然則予之
言又居士立號之補遺也

題長江萬里圖

長江西起巴蜀東盡吳會首尾萬里昔吳晉據此以抗
曹操走苻堅當時江上戰舸相望也此圖為錢塘汪孟

文所作為殷氏景禧所藏江水粼粼柯石無恙即兩崖而觀之見夫駢者步者坐者立者歌者飲者與夫持網畧者操舟楫者及渡水而負薪者樓居而穴處者皆熙熙然無驚虞竄伏態其為南北混一之時乎其為海晏河清萬物各得其所之時乎予少壯時過江上嘗欲渡舟而西登岷山絕頂飲江水之源而吞吐之以觀夫滔滔而逝者之所終始恨未能也殷君生逢太平之世往來江上亦多年矣不知有此意否

題都隱十咏卷後

包君汝調作都隱十咏其時已為南都主客部主事矣
然而以隱名者其志可知也蓋綰簪組而有山林之趣
享膏粱而有蘆菹之味此為不改其素者也不改其素
學之至者也君子蓋深許之焉若謂汝調不事事而以
竹木水石自娛則非矣

跋余氏家譜

余氏為浙東儒家宋末有諱吳者為江浙儒學提舉宋

草命閉門不食而死聞壘山謝氏嘗稱其為一代名流
提舉九世孫中之修譜守其祖思菴遺囑斷自提舉為
始提舉以下始致詳焉蓋慎之也余氏自提舉以節義
名家而子孫若思椿息齋求仁竹泉梅槎諸老皆以儒
術繼之故其世益綿而氣節詩書之談至今不衰蓋其
所以道之者深矣譜以漢表為式而義例則余君所自
立時有取思椿一二則云

跋杏莊私稿

詩未易作亦未易評也世之評詩者如雲裏看月霧中
觀花雖皆談其淺深終不得其形似廣德為東南大州
人才放落文事不興近時有馬叔山者吾嘗得其殘篇
斷簡於卷牘中喜其清婉可讀誦鑒學典科王文粹嘗
游於其門故其所作詩多祖馬氏近以其杏莊私稿請
予評予披閱之花香月影騰於紙劄雖然詩之道未止
於此也勉而深之其至矣乎

跋陳可軒詩集

古者之詩大要以養性情為本自後世觀之唐詩尚聲律宋詩尚理趣元詩則務為綺麗以悅人然而今之學詩者喜自元入手豈綺麗之語易於移人而澹白之辭難以造意耶予為兒時聞吾鄉陳可軒先生能詩今其子會稽教諭華玉刻之學官雖未辨其聲律理趣出入於唐宋間何如要之去元聲遠矣欲養性情者宜於此求之

跋林氏風木圖

韓詩外傳載臯魚子感風木思養其親不可得而繼以
槁死於戲悲哉臯魚子之為心也世人固有享萬鍾九
鼎之養而不知思其親者矣若臯魚子之思親則又思
之過也林氏之為此圖其慎知所擇哉

跋陳登千文帖

字心畫也放意則荒取妍則惑故古人作字甚敬永樂
間吾閩陳公登工八分小篆用知者薦入為中書舍人
今觀其書不縱奇以入怪不詘意以諧俗適美園勁古

意渾然此其用筆本於敬者歟淮北王敬之得此而出示於予予聞王君居官本於敬宜其好有及於此

跋趙子昂墨蹟

右書為遼西賀克恭所藏觀者以為元集賢學士趙子昂所書予不習趙書未有以辨其果然與否然聞子昂宋秦王德芳之後世祖初召入或以宋後忌之世祖見其姿色媚麗婉婉如美婦人遂用之不疑今觀其書政類其為人烏虜是為子昂也耶

跋左氏節孝傳

予讀後漢書嘗手錄列女傳以教諸女中間稱孝行至曹娥而止稱禮節至皇甫規妻而止蓋漢自中興以後僅見此數人今讀涇縣左氏傳累數百言稱其節孝事豈古之所難而今之所易哉雖然傳作於陳獻章其所稱述必有稽也果然則古人心不大相遠而治化淺深可槩見矣

跋宋御書赤壁賦

右泥金赤壁賦一道有宋御書圖識或以為祐陵或以為思陵或以為阜陵書皆未可知然而骨肉豐潤神氣凝遠譬如幽花脩竹生長臺榭中自有一種天然風韻可愛要之為宮閭書也夫宋自裕陵後國家不可謂無事矣為帝王者當日讀大學尚書以圖治本顧乃不此之務搗金為泥書清竒怪偉之文以為珍玩此宋之所以不競也

書謝氏敦彞十二會後

黃岩謝氏歲合其族之良為十二會會以敦彞為名戒
飭存焉君子曰禮興家之本也今觀禮於謝氏而知謝
氏所以興也夫人情猶水也非防則泛謝氏能以禮約
情防斯固矣況其族多賢凡與會者皆能用命於其長
禮其成乎君子觀禮於謝氏而知謝氏所以興也

書晦翁法帖後

晦翁書表裏洞達觀其書令人穢濁消盡翁自言學曹
操操曖昧人書法當不至此豈翁學其點畫而自舒其

胸中之秘耶王溪帖瑛過建寧翁九世孫博士君燉出以示瑛乃摹歸刻諸廣德學宮此翁真蹟也

跋重刻荔枝譜後

書法自晉至于宋凡二變矣晉尚風韻唐稍收斂而就規矩宋則破格書之而豪縱不拘焉蓋其乘除之勢然也嘗觀鄉先正蔡忠惠公書獨與宋人不類結構精密神思凝重有石經之遺意豈其心法獨得不為世俗所推移者乎予愛公書而不得善本此譜其再傳者初公

有真刻為富家子所得將磬為墓誌鄉人鄭立久見之
亟搨以歸而鋟諸梓甫中所傳僅有此耳予知廣德州
友人黃仲昭以畀予予就蘇守丘時雍求良工美石刻
之以教州人云

跋汪教諭家藏先世手卷

鑿之為術自岐黃至于華扁而止文之為術自韓柳至
于歐蘇而止外此而有稱者皆希世之見也洪武中黃
岩汪先生信中以鑿鳴同邑潘先生貞以文鳴汪之鑿

能不拘于方而會于意意之所投效輒隨之潘之文其
體紆迂曲折其辭渾造澹白初不為聱牙鉤棘以齟齬
人口而極力於為古者反不之及後八十年為天順甲
申汪曾孫秉淵由浙省發解來主漳浦縣教事出潘先
生貞贈其祖信中文一通先正寥闊之餘兩覩希世之
見可謂奇遇矣因書其後以歸之

題梅莊卷後

宣文獻家稱南湖貢氏貢氏封監察御史伯潤公自號

曰梅莊嘗賣卷入廣德索予題予三年未有以復之也
歲暮天寒假寐東園書室夢舫舟南湖之上見梅花蔽
野中有竹籬茆舍一老人揖予曰江山搖落歲華暮矣
吾子何為乎至此予曰人世無著身處所以疑于長者
之居老人指梅花曰子知此乎予曰是為白而不緇者
乎瘠而不腴者乎熒然孤芳灑然古意而不與草木俱
者乎老人曰子盍為我賦之予曰歲晏溪山蹤跡孤一
生心事在西湖高風古調無人識贏得丹青作畫圖又

曰茆屋短簷白日斜小橋流水見疎花乾坤清氣無人
管盡付西湖處士家老人蹶然曰子知我矣取酒酌予
謀相與共賦之忽雀噪庭樹而夢覺矣予顧從者曰南
湖之上有梅野乎曰無之然則適者之夢殆侍御公所
謂梅莊者耶因稍次第夢中語以復之公報曰梅莊之
樂子分我矣

題陳節婦傳後

邵子曰死天下之事易成天下之事難予識古列女傳

見諸貞節婦死於其夫者往往有之至於相其夫以保其家而使其後益振則不多見焉今觀泉州陳節婦當盛年時夫既沒舅姑繼逝夫二弟未髻鬣而其孤在襁褓方是時節婦一轉足則無李氏矣顧能以貞節自勵塋其夫與舅姑撫夫之二弟至于有成鞠其孤傳於其孫汝嘉竟以科第顯是可謂能成天下之事者矣於虜是豈特婦人女子所當法哉

題張大參廬墓八咏冊

居喪廬墓其禮之過乎廬墓有所歌咏其哀之過乎昔人云喪與其易也寧戚是廬墓亦戚之至也又云長歌痛於慟哭是歌咏亦痛之至也世之論禮於人往往不求其情而觀其跡不知瞻奉几筵者或有忘親之心戀慕山林者或有懷親之意嗚呼此瑛觀大參張公廬墓八咏不敢輕致議於其間也

題如此軒

予治廣德之明年作東園書室旁闢一軒為棲息之所

客有坐軒中者曰居官持已固宜直方然亦宜稍迂迴以順適于上乃有容予曰世固有直道事人而為人所棄者有枉道事人而為人所取者然為人所棄者而天喜之為人所取者而天厭之一得天一得人輕重何如耶客曰子自信如此其能起乎予曰不能也因題其軒曰如彼則起如此則止寧可如此不可如彼

題德威堂

予書滿北上節判王君大書德威字扁于州署予歸而

善之且為之說曰君子為政有德則民愛之有威則民畏之然所謂德非小惠而所謂威非濫刑也亦曰正體統立紀綱德敷於下而不為偏頗則民愛之矣定功過明賞罰威行於下而無所苟免則民畏之矣夫德者公也威者信也公則恩溥信則令行此君子為政之道也舍此不務則非吾所謂德威矣

題資善堂屏門

漢董子言觀天人相與之際可畏於虐是誠可畏也蓋

其為報毫髮不爽因推其說勒于屏門曰天心好善而惡惡人立心造行務須湊合天心今日為善明日為善始終為善與天周旋則天與之矣今日為惡明日為惡始終為惡與天背馳則天棄之矣天之所與其興也勃然天之所棄其敗也歟然吾閱世多矣凡忠君孝親濟人利物日為善如不足者其後多昌凡欺君悖親傷人害物日為惡如不足者其後多敗是不亦為可畏乎知其可畏則不待驅迫而趣於善矣凡我子孫宜用刻骨

題嘉魚李氏義學

嘉魚有士族曰李氏李氏先世曰宗儒宗儀宋慶厯間
相與建義學于其所居西保湖西以待四方學者建炎
亂學廢慶元間其孫貢元名桂者復之縣判云鄉校不
存家塾獨著此難事也今新脩縣志載其事特詳弘治
辛亥瑛以鎮遠知府書滿歸宗儒某世孫承箕來謁為
說甚異最後請曰先世義學願有言承箕字世卿嘗取
鄉第矣近游南海從陳白沙歸遂欲居大崖山以老其

說以為靜極則心虛心虛則理見故視六經若土苴視
形骸若仇敵視聖人所立禮義之防若纏束網縛欲徹
去之白沙予友也二十年前同在都下瑛見其神清氣
完心地定疊往往以其靜觀天下之動竊以為古閑關
人也今世卿從白沙不知此意果出白沙否果出白沙
則吾盡已之說矣聽世卿擇焉瑛聞人心無外聖人靜
有以立天下之大本動有以行天下之達道由體及用
一以貫之自餘為學皆由博以及約博者萬殊也約者

一本也求諸萬殊而後一本可得既得一本則所謂萬殊者亦可推此以貫之矣瑛請得以言其功程次第蓋始學之要以收放心為先務收放心居敬是已蓋居敬則心存聰明睿知由此日生然後可以窮理窮理者非靜守此心而理自見也蓋亦推之以極其至焉耳孟子曰萬物皆備於我矣此言人心無外也不即物以窮理其能靜此心之體乎故自性情之微以及形骸之粗自食息之末以及綱常之大有六經之奧以及天地萬物

之廣皆不可不求其理求其理謂求其自然與其當然
又於自然當然求其所以然積累既多自然融會通貫
而於所謂一本者或自得之矣一本固非學者所敢言
然聞之中庸有曰喜怒哀樂之未發謂之中又曰上天
之載無聲無臭至矣此譬如穀種雖曰塊然而根苗花
實皆聚於此又如雞卵雖曰渾然而羽毛嘴爪皆具於
此及其發見於行事在聖人則體用一貫在學者未免
差悞蓋在己者有所拘蔽故所發不無偏重之殊在外

者有搖奪故所施不無遷就之異然而既見本源則於處善亦安循理亦樂至於患難事變雖以死易生亦甘心為之矣此聖學之大畧也今夫靜坐不相與講學窮理果足以立天下之大本乎果足以行天下之達道乎因記官禮部時嘗夢入僧寺見木案閣古書數帙取視之皆言動靜有無予曰子靜云何僧曰吾所謂靜與儒同靜無而動有也予曰是惡得同儒於靜言無雖無而實有也惟其實有是以見諸用也天高地下萬物散殊

不可改易子謂無則直無耳吾知其見於用也天可以
為地地可以為天雖欲不倒置不可得也時白沙在側
白鬚而朱頰予質以僧言笑而不答此事嘗書以寄白
沙矣今世鄉論學與瑛異復欲得瑛言故備書之以附
義學諸題跋之後世卿謂何白沙謂何

觀冒有恒太守所藏黃石公像

黃石翁識得一幾字子房用之以佐漢祖卒定天下蓋
幾發乎此應乎彼者吉凶存亡係之矣此畫武昌太守

冒君所藏相傳趙孟頫作按良本傳曰圮上見翁後遂
不復見後過穀城得黃石以歸而廟祀之及卒與俱塋
未嘗言其狀貌何如此畫貌深而思遠冠服儻然非塵
埃中人也亦可謂得其狀矣冒君宜珍此冒君宜珍此
弘治辛亥莆田周瑛觀于武昌舟中

題花籃夫人宮詞後

右宮詞花籃夫人作按灌志夫人灌縣人姓費氏陶九
成又云蜀青城山人姓徐氏以才色入蜀主孟昶宮中

所作宮詞凡百首國破流落無存此二十八首宋王平甫錄入三館者今見灌縣志中皆述當時宮中事觀其所述極言龍池鳳苑之盛離宮別院之多中間燕賞遊幸之頻數張設供具之侈靡打毬走馬之戲樂採蓮鬪船之諧謔題詩寫字之誇詡其相與周旋者皆宮娥也每月給買花錢宮娥近數千焉吁奢淫至此可謂極矣吾於是知蜀之所以亡也費氏讀書能詞章其材可謂高矣一旦國亡身虜不能以禮自裁委身他姓誦詩後

庭亦可醜也宋太祖近代賢主削平僭偽而乃奪人妻
妾以為已有此盛德之累也故吾讀是詩而竊嘆夫三
失德焉吁可以觀矣可以戒矣

讀楊鐵崖古樂府

樂府始於漢惟二侯章其詞壯浪餘皆意氣和平淵永
想當時被之管絃必雍容和美令人心醉鐵崖生當叔
世才俊氣逸外感內憤漸入於戾此詞可謂工矣然施
之樂府不幾於北鄙之聲乎鐵崖囿氣化中不自知也

當時顧亮張憲李費輩皆在門下使稍知風雅餘韻必
不更求崛竒以勝之矣

讀釣臺集

漢嚴子陵事史家濶略故人皆識不破近讀嚴州府所
刻釣臺集凡為論說累數十家皆各自為說終莫能得
其心也子竊思之子陵蓋世之豪也其志有所主矣當
西漢末士大夫習譚成風無復禮義廉耻及王氏篡國
有如歆如雄者皆附之子陵恨不得上方斬馬劍斬諸

邪佞而以其高潔之心孤特之操剛大不拔之氣橫當其衝欲以銷其變使天下後世復知有人道之大閑此子陵之志也世祖少與同學及即位思其賢物色以求之既得之澤中使者凡三往而後至其至也帝館之北軍給之床褥大官朝夕進膳陵視之若不知焉侯霸何人乃遣使奉書欲屈致與語予謂此帝使之也帝欲觀陵去就姑以是試之意謂子陵來則漢廷卿佐也不來其霄漢冥鴻乎子陵得書不報但口授使者曰懷仁輔

義天下說阿諛順旨要領絕蓋上句欲霸弼東漢之新
治下句欲霸絕西漢之故習其辭可謂直其禮可謂倨
矣帝聞之即日車駕幸其館蓋知子陵不可屈故就見
之帝入館子陵卧不為起帝曰子陵獨不為故人屈耶
陵曰士各有志何故相迫大帝萬乘之主也子陵視之
即前日舂陵之文叔耳此其精神氣魄上摩霄漢不待
舉足加帝腹而後來太史星象之占也帝知子陵不可
屈獨念夫諫議官者天子所與計天下國家安危者也

陵有志天下事其或以是留哉殊不知子陵之志何在
其所以幹旋世道者何在顧肯猥就臣僕隨事論事補
塞罅漏而已耶此子陵所以終於去也當時侯霸不知
子陵固也世祖故人亦何不知耶世祖不知子陵固也
後世賢人君子凡天下事皆推見至隱又何不知耶予
見子陵自言曰士各有志因推其志以著其說

讀劉靜脩渡江賦

渡江賦者元虞士劉駟作也元將伐宋駟作此以勗之

中間設為淮南劔客相與論難其所以審地勢計攻守
度彼我之情狀無不曲盡可謂長於料事矣然求其所
以問罪不過曰郝翰林奉使南朝九年不還而已考其
論列用師不過以元之強足以制宋之弱而已愚讀其
賦竊有疑焉昔湯與葛伯為鄰葛伯稱無犧牲不祀湯
遺之以牛羊葛伯食之又稱無染盛湯使人往為之耕
葛伯殺童子而奪其餉湯於是乎有葛之征南朝拘留
此使固有罪矣然考其事乃謀國不臧者構成之也吾

聞世祖初立也遣江湖荆淮宣撫使郝經充翰林學士
使宋告即位且尋鄂盟以講好息兵為事時有王文統
者忌經乃遣李壇侵宋以撓之其侵宋者王文統也世
祖不知也先是世祖為皇弟攻宋鄂州宋遣賈似道援
鄂會元帝文宗崩世祖入正大統因與講和以去似道
攘為戰功盛稱于朝及經來似道恐敗露乃幽之真州
不使入見時宋理宗年高亦不知也然而元有敗盟之
舉宋有啓釁之端皆羣臣構成之兩帝皆不知也駟儒

者也何不即湯與葛之事勸其君乎何不暴白彼我情
罪使有歸乎夫滅人之國大故也主張用師儒者大作
用也予讀湯誓有曰夏王卒遏衆力率割夏邑其民皆
曰時日曷喪予及汝偕亡此湯所以伐桀也又讀太誓
牧誓有曰商王受力行無度播棄黎老昵比罪人又曰
商王受弗敬上天降災下民焚炙忠良剝剔孕婦又曰
商王受自絕于天結怨于民斲朝涉之脛剖賢人之心
此武王所以伐紂也駟請詢之南人宋君有一於此乎

又詢之北人宋君有一於此乎無一於此而伐之不過利其土地人民而已非商周吊民伐罪意也又何必昌言之哉愚竊以為是時宋有天下半西自川陝南至交廣東至江淮閩越皆尚宋有使得人以主軍國重事用文天祥計分天下為四大鎮號召豪傑相與犄角我勢大而難摧彼力分而易制元雖深入未必盡得意如駟所料也駟學孔孟者也性地高潔識見踈朗凡所議論皆高廣深迥雖雜詩亦然予欣慕之獨于此賦竊有疑

焉豈其居夷既久雖有春秋之義而不知耶或不欲以
酸腐自居而假此以彰其迹耶抑駟所見所言皆是而
予所致疑者非耶此窮理一事姑著其說以俟知者

讀吳草廬年譜

按年譜草廬為宋舉子而仕於元評事黃仲昭曰此譬
如人家處女雖已受聘而未成昏改嫁可也予曰此君
以草廬為有道之士強為分疏耳夫人進學有先後聞
道有蚤暮而前後是非不可以相掩也草廬晚年進學

未易窺測若舉平生言之豈能每事盡善哉宋非桀紂之暴元非湯武之仁一旦奪其有而據之雖異世間者猶有所不忍況在當時沐其清化者乎況嘗受其禮聘將與謀天下事者乎同年周時可曰吳文正以草廬自號且仕元之日淺有以哉

讀陳節判纓詩集

予嘗謂詩有景有情有事景真情真事真便為佳作如集中送鍾太守東行詩云洞庭秋色晴看鴈揚子江聲

夜聽潮此景真也中秋與徐判簿酌別詩云月色無如
今夜好人情誰似故鄉親此情真也中秋後一夕彭郎
載酒來訪詩云昨夜中秋翫月時此心暗與故人期故
人今夜能相訪月色還來照酒卮此事真也如此之類
皆是佳作唐音和平佳作大畧似之唐音所以和平非
徒作多蓋由學博材鉅拈得來便應手耳和平未易學
纔學和平便易低弱稍加振迅又覺突兀其要在積學
養氣及善用字以調和之耳此據予所見而言高明以

為何如

觀石林書院題署

宋葉公少蘊知撫州日建石林書院講明正學今廢久矣其裔孫奉等相與重建之嘗請予作題署予倥偬中為此不自知其工拙何如也今予改郡鎮遠道出石林因登書院拜少蘊公新主見題署楮宇間不覺為徘徊瞻眺者久之夫神雋出奇予不多讓古人然勢過險迫少雍容和緩態則又其病也昔人謂字為心畫觀此則

予改郡以去夫豈自外至哉

觀南康太守郭公璿受誥勅圖

受誥勅而備錄其詞昭君貺也得君貺而昭宣之示不
忘也古者臣子受君策命皆勒諸器以藏諸廟如詩所
謂作召公考天子萬壽古器物銘所謂用作朕皇考龔
伯尊敦用勳眉壽萬年無彊是已今南康守臣璿初為
同知青州府事善於其職至是天子授以誥勅璿既拜
手稽首以受之矣又備錄其詞作為鉅冊如古勒器物

云者蓋將使其子孫覽是冊而知乃祖乃父居官謹脩
職業不敢廢墜如是又知國家所以寵賚臣庶不苟如
是則夫思所以紹述之者其容以自已乎其所托遠矣

題族子叔高勿齋冊

族子叔高既領鄉第謁予臨汝歸請予題其所謂勿齋
者予曰子知勿之為義乎說文謂勿州里所建旗也一
柄三旂所以趣民者也子之為學亦慎其所趣哉蓋趣
吾心於道義則於道義歸焉趣吾心於功利則於功利

歸焉此二者王霸所自分也而所以趣之者以志為主
然學之弗博擇之弗精守之弗固則此志不知所主固
有捨夫道義之正而趣夫功利之私者矣子其慎之乎
吾祖宗積德多年子孫宜有興者子為學誠能正其志
以慎其所趣則他日論人物於吾周氏孰不曰吾子賢
畫評


浙人王宗輔以畫求評予曰畫種類多予未能徧識但
以予學書法觀之粗得其槩凡書先觀其點畫次觀其

結構次觀其變化有點畫而無結構不取也有結構而無點畫不取也有結構有點畫而無變化不取也上焉者神與天遊不假模倣自有真趣次焉者點點畫畫模放他人神氣不足下焉者不知而作自謂得之去書遠矣畫家法為說頗多以此求之其庶矣乎宗輔未達予曰皴皴塗抹字點畫也安排布置字結構也將濃而淡將顯而隱字變化也知此思過半矣

饒戒

吾官鎮遠嘗睹於物得三戒焉虎性饒不擇肉而食有
羊牧崖上虎攫之羊負痛墮地死虎隨之虎墮地不死
而重傷焉竟為鄉人所斃蠍虎亦性饒蠍虎緣壁行入
燕巢以食其雛雛負痛墮地蠍虎隨之雛在地飛躍家
人為送入巢蝎虎不能動雞食之蟻亦性饒凡物有大
於己者皆負致以行務入其穴乃止有蚓出穴蟻羣嘬
之蚓負痛宛轉泥沙中卒莫能制蚓鴨出欄井食之夫
虎貪食羊不知羊死而身斃蠍虎貪食燕雛不知燕雛

得全而已不免蟻貪食蚓不知與蚓并為鴨所食嗟夫
利者害之所伏也得者喪之所倚也為饒不已者可以
戒矣



翠渠摘稿卷四